

COMUNICATO n. 470 del 01/03/2025

Manà fora su Trentino Tv l program l vegn endrezà dal Comun General de Fascia

“Pedies”: per en sabeda 1 de mèrz vegn fora la puntata #475 del program ladin per la televizion

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata 475. I argomenc de chesta setemèna l é: “Cognoscion l’autonomia”: con chest titol l Consei provinzièl de Trent l vel uzèr fora sul teritorie, co n’atenzion outa soraldut ai joegn, l valor de chesta particolarità che caraterisea nosc raion. L è per chest che en jebia ai 20 de firé, aló da la Scola Ladina de Fascia l è stat fat na scontrèda dedichèda a chesta tematica olache apede a desvalives raprezentanc politics, a professores universitàres, al Procurador del Comun General de Fascia, à tout pèrt ence i studenc de la Scola Ladina de Fascia e de la scola auta de Rorei; en ocajon de la Dì internazionèla del lengaz de la mère 2025, che la è stata ai 21 de firé, l Ofize Linguistich del Comun General de Fascia l à metù a jir n event n muie curious te Piazz del comun de Poza. Col didament de Marco Mattia e de si aparac tecnics, l é stat portà dant al public na performance musicala fata coi sons de desvaliva paroles ladines. L ladin donca, con si sons forc e sibilanc l à dat l met de creèr zeche da bel e deldut fora de anter; la Magnifica Comunità de Fiem la è stata protagonista de na convenzion col Comun General de Fascia e la Comunità comprenjorièla del Überetsch-Unterland outa a valorisèr la patrimoniè linguistich di trei lengac che vegn rejonà sun so teritorie: l ladin, l todesch e l talian. L fin l é chel de meter a jir projec de valorisazion e de enrescida sui lengac locai, e ence sui dialec de Fiem, a na maniera de ruèr ti egn a meter enesema, ence col didament de esperc, na regoeta de material linguistich e de ge l proferir a la jent ence trèz dizionères online; per la neva rubrica “Piates: chel liber sun scancia” dedichèda belimpont a la prejentazion de tes, Alberta Rossi de la Majon di Fascegn la ne moscia vèlch liber che l trata del carnascèr. Più avisa la ne met dant aspec tradizionèi e inovatives che revèrda belimpont la facera de legn che la rapresenta sessaben un di elemenc più emportanc de la tradizion del carnascèr fascian e che amò anchecondi, ence te anter i joegn, la vegn vivuda e portèda con gran gaissa.

I report de chesta setemèna, enjigné da Riccardo Zanoner, Angela Pederiva e Sabrina Riz, i vegn porté dant da la ousc de Riccardo Zanoner.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su Trentino Tv – canal 10 de TN- vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun AltoAdige TV – canal 11 de BZ - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

Se pel veder i servijes un a un su la piata Facebook de TV Ladina:

<https://www.facebook.com/TelevijionLadina>

Traduzion di Servijes Linguistics e Culturèi del Comun general de Fascia

(cdt)